

Zeitschrift: Historischer Kalender, oder, Der hinkende Bot
Band: 274 (2001)

Artikel: Ds Inserat
Autor: Maurer-Arn, Trudi
DOI: <https://doi.org/10.5169/seals-655296>

Nutzungsbedingungen

Die ETH-Bibliothek ist die Anbieterin der digitalisierten Zeitschriften. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. [Siehe Rechtliche Hinweise.](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. [Voir Informations légales.](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. [See Legal notice.](#)

Download PDF: 27.04.2025

ETH-Bibliothek Zürich, E-Periodica, <https://www.e-periodica.ch>

Ds Inserat

E Redakter erläbt nid nume Luschtigs – aber das o!

So, wi eistags, won ihm e Frou isch gmäldet worde, wo eifach zu ihm sälber welli ... Är sött e Leitartikel verfasse, aber es söll nid sy: Äs chlöpferlet a syr Büro-Tür, u de chunnt es chlyns, brings Froueli yne u stellt sech vor ne häre: «E, i möcht nid störe, aber es isch wäge emene Inserat», brümelets mit lysliger Stimm.

«Da syd der aber am lätzen Ort», macht der Fred Suter, «d Inseraten-Abteilig isch im undere Stockwärgch.»

«I weiss scho, i bi drum scho dert gsy, aber ...»

«Was isch de, het niemer Bscheid gää?»

«Wohl, scho ... aber es sy dert numen eso ... Fröilein.»

«Wäre nech Manne lieber?» fragt der Redakter zrugg.

«U nei, das hätt no gfählt.» Di Frou isch zämezuckt.

U wo der Suter fragt, öb die Töchtere nid früntlech sige gsy, het si gemeint, es syge halt alles eso jungi Tüpfli. Das heig doch nüt mit em Alter ztüe, het der Redakter etgäge gha.

«Wüsst der, Herr Redaktor, es isch drum nid es gwöhnlechs Inserat.» Sie chramet ime ne abgeschabete Handtäschli u ziet es handgschribnigs Blettli use, wo si em Her Suter zuechestreckt.

Dä vertieft sech i di Lektüre: «Heit ders sälber gschribe?» fragt er du.

Di glungnegi Frou het ganz roti Bäckli übercho: «Gället, es isch ... schön? Wüsst der, i ha drum zu myr Zyt albes bim Dokter Kuehn, wen i ds Wartzimmer putzt ha, i der «Florabelle» eso wundervolli Inseratli gläse.»

Der Suter Fred cha nid verhindere, dass ihm

es fyns Lächle über ds Gesicht geit, un är list lut vor: «Mein Herz sucht einen Ankerplatz – hm ... – Repräsentative Dame in den reifen Fünfzigerjahren mit Erspartem und schöner Aussteuer sucht gebildeten Herrn (auch Witwer angenehm) in pensionsberechtigter Stellung, um miteinander Freud und Leid des Daseins zu teilen und Hand in Hand in eine schöne Zukunft zu wandern ... – hm, ja.»

«Gället, das tönt nid schlächt?», seit sy Bsuechere.

«Töne tuets guet,



Der Orkan Lothar vom 26. Dezember 1999 hinterliess im ganzen Land Bilder wie dieses.

(Foto: Hansueli Trachsel, Bern)

aber i frage mi ... «repräsentabel» isch vilicht nid ds richtige Wort ... schrybet vilicht «Nette Frau».

«We der meinet ... drum bin i ja zue nech cho.»

«U das mit em Ersparte u der Usstüür? Stimmts?»

«Ällwäg de scho! Won i doch ufem Sparbüechli über achtusig Franke ha unes Dotze bravi Lyntüecher, es halbs Chüssi-Aazüg u öppis Silbersteck u ...»

Der Fred Suter underbricht di Ufzelleri: «Das isch ja guet. Nume no ei Frag: Heit der nech under däm «gebildete Her» e ... Gstudierte vorgstellt, e so genannte Akademiker?»

«Das grad nid, aber, es sött schon echli e ... Bsundere sy.» Jitz isch di Frou echli muff: «I gloube fasch, dihr weit mys Inseratli gar nid.»

Der Redakter seit, er möcht se nume vor Enttäuschige bewahre, u si wortet, di heig si scho früecher gha, drum heig si jitz gschribe, was si gärn wetti.

Der Redakter meint, me sött halt einiger-masse bi der Wahrheit blibe. «Wi steits mit em Alter?»

«O wäge däm: I ha eis gläse, dass grad Filmschouspilere geng es par Jährli tüjen abzelle.»

Der Suter steit uf, leit ds Inseratli ine Mappe: «I däm Fall giben is zum Setze. U jitz müesst der mi la wyterwärsche.» Er streckt ere d Hand etgäge.

«I wets grad zale.» Si chnüblet ds Portemonneeli usem Täschli. Er wehrt ab u meint, si überchöm den e Rächnig. «Gäbet de im Büro unde Eui Adrassen a.»

Aber si het no öpis ufem Härze: «I wett nech no danke, Her Redakter, dass der mer ... gholfe heit. Wüsst der, dihr erinneret mi däre-



Heftige Regengüsse verursachten zusammen mit der Schneeschmelze im Mai 1999 Überschwemmungen wie hier in Thun.

(Foto: Hansueli Trachsel, Bern)

wäg a Dokter Kuehn, won i bin em füzg Jahr im Hushalt gschaffet ha. Mit ihm bin i geng prima uscho, hingäge mit syr Frou ... Wiso müesse geng die Nättiste stärke?»

«Was heit der gseit, gueti Frou? Füzg Jahr am glychen Ort dienet? Das isch ja sensationell!»

«Es isch halt e guete Platz gsy ...»

«Das mues id Zytig.» Der Suter Fred geit zum Schrybtisch u nimmt der Telefonhörer ab: «Ja, hie Suter. Chöit der mi mit der Frou Aebischer verbinde, wo d Frouesyte macht! Ja, hie Suter, loset, i ha hie ganz e ... sältene Frou bi mer, füzg Jahr ir glyche Stell dienet, ja, das isch so sälte, wi öpen e wysse Elefant. Da wei mer e Reportage mache. I schicken ech di Usnahme-Erschinig grad ufe. Machet emene Fotograf Bscheid. Merci.» Er hänkt uuf.

Di Hüratswillegi isch ganz verschmeijet: «Aber, i chume doch nid ir Zytig, das wär mer nid rächt.»

«Wolöpe mache mer e Pricht über Euch.»

«Aber de mys Inseratli?»

«Das chöit der nech wahrschynlech erspare. Dihr überchömet den e Huufe allergattig Poscht.»